

ما تتلفتش

لما صوت الصرخة يعلا
سيبها تعلا ما تتكسفش
لسة ف الصرخات حقايق
متدارية وما اتقالتش
سيبها زي الرعد تطلع
وأما تلقى البرق يلمع
داري عين وما تلتفتش
كل شيء معجون بغش
إلا صرخة قهر طالعة
من وريد متعبي ظلم
ميت كابوس كان أصله حلم
وانقلب تفسيره لما
خش ف بحور الهزائم
جوه موج مالهوش نهاية
إوعي ترضى تعيش ف قصة

وانت كومبارس الحكاية
ألا تصحى تلاقي نفسك
ف الميدان تمثال حجارة
أو يا دوب حبة عفارة
جنب أي رصيف قديم
مين ملاك يقبل ف لحظة
ينقلب شيطان رجيم؟
لو طريق الناس جحيم
خش وامشي ف قلب نفسك
وأطلق الصرخة الحبيسة
من قفص صدرك
وحاول..
تبني ذاتك جوه ذاتك
لو تكون بنا ومناول
اوعى يوم تطلب مساعدة
اوعى يوم تطلب مقاول

دا الجميع ماسك معاول
لجل يهدم كل حة
إنت كنت ف يوم بنيتها
خلي روحك جوه بيتها
واقفل الباب الموارب
واحمي عقب الباب ليدخل
وانت سرحان العقارب
اوعى تسمع خبطة تفتح
دا اللي ع الباب التعالب
وان بقيت ف الصحرا حاول
تبني وسط الصحرا قارب
يومها بس ح تبقى غالب
لما تلقى الكل غرقى
وانت ناجي من الطوفان